

影梅庵憶語

如皋冒 襄辟疆著

愛生於暱。暱則無所不飾。緣飾著愛。天下鮮有真可愛者矣。矧內屋深屏。貯光閨彩。止憑雕心鏤腎之文人描摹想像。麻姑幻譜。神女浪傳。近好事家。復假篆聲詩。侈譚奇合。遂使西施。夷光。文君。洪度。人人閣中有之。此亦閨秀之奇冤。而噉名之惡習已亡。妾董氏。原名白。字小宛。復字青蓮。籍秦淮。徙吳門。在風塵雖有豔名。非其本色。傾蓋矢從余。人吾門。智慧才識。種種始露。凡九年。上下內外大小。無忤無間。其佐余著書肥遯。佐余婦精女紅。親操井臼。以及蒙難避疾。莫不履險如夷。茹荼若飴。合爲一人。今忽死。余不知姬死而余死也。但見余婦。燐燐粥粥。視左右手罔措也。上下內外大小之人。咸悲酸楚痛。以爲不可復得也。傳其慧心隱行。聞者歎者。莫不謂文人義士難與爭儔也。余業爲哀辭數千言。哭之。格於聲韻。不盡悉。復約略紀其槩。每冥痛沈思。姬之一身。與偕姬九年光景。一齊湧心塞眼。雖有吞鳥夢花之心手。莫克追述。區區淚筆。枯澁黯削。不能自傳其愛。何有於飾。矧姬之事余。始終本末。不緣狎昵。余年已四十。鬚眉如戟。十五年前。眉公先生謂余。視錦半臂。碧紗籠。一笑。瞳若。豈至今復效輕薄子。漫譜情豔。以欺地下。儻信余之深者。因余以知姬之果異。賜之鴻文麗藻。余

得藉手報姬。姬死無恨。余生無恨。

已卯初夏。應制白門。晤密之云。秦淮佳麗。近有雙成年甚綺。才色爲一時之冠。余訪之。則以厭薄紛華。挈家去金閨矣。嗣下第。遊吳門。屢訪之半塘。時逗遛洞庭不返。名與姬頗頡頏者。有沙九畹。楊漪炤。予日遊兩生間。獨咫尺不見姬。將歸棹。重往冀一見。姬母秀且賢。嘗余曰。君來數矣。予女幸在舍。薄酒未醒。然稍停復他出。從鬼徑扶姬於曲欄。與余晤。面暈淺春。顰眼流視。香姿玉色。神韻天然。嫵慢不交一語。余驚愛之。惜其倦遂別歸。此良晤之始也。時姬年十六。

庚辰夏。留滯影園。欲過訪姬。客從吳門來。知姬去西子湖。兼往遊黃山白嶽。遂不果行。

辛巳蚤春。余省觀去衡嶽。繇浙路往過半塘。訊姬則仍滯黃山。許忠節公赴粵任。與余聯舟行。偶一日赴飲歸。爲余曰。此中有陳姬某。擅梨園之勝。不可不見。余佐忠節治舟數往返。始得之。其人澹而韻。盈盈冉冉。衣椒繭。時背顧湘裙。真如孤鸞之在煙霧。是日演弋腔紅梅。以燕俗之劇。呀囁晰之調。乃出之陳姬身口。如雲出岫。如珠在盤。令人欲仙欲死。漏下四鼓。風雨忽作。必欲駕小舟去。余牽衣訂再晤。答云。光福梅花如冷雲萬頃。子能越旦偕我遊。否則有半月淹也。余迫省觀。告以不敢遲留。故復云。南嶽歸棹。當遲子於虎嘯叢桂間。蓋計其期八月返也。余別去。恰以觀濤日。奉母回至西湖。因家君調已破之襄陽。心緒如焚。便訊陳姬。則已爲寶霍豪家掠去。聞之慘然。及抵閭門。水溢舟膠。去汭關十五里。皆充斥不可行。偶

晤一友。語次有佳人難再得之歎。友云子悞矣。前以勢劫去者。賈某也。某之匿處。去此甚邇。與子偕往。至果得見。又如芳蘭之在幽谷也。相視而笑曰。子至矣。子非雨夜舟中訂芳約者耶。曩感子殷勤。以凌遽不獲訂。再晤。今幾入虎口得脫。重晤子。真天幸也。我居甚僻。復長齋茗椀。爐香留子。傾倒於明月桂影之下。且有所商。余以老母在舟。緣江楚多梗。率健兒百餘護行。皆住河干。饕餮欲返。甫黃昏。而砲械震耳。擊礮聲如在余舟傍。亟星馳回。則中貴爭馳河道。與我兵鬪。解之始去。自此余不復登岸。越旦則姬澹妝至。求謁吾母太恭人。見後重堅訂過其家。乃是晚舟仍中梗。乘月一往。相見卒然曰。余此身脫樊籠。欲擇人事之終身可托者。無出君右。適見太恭人如覆春雲。如飭甘露。真得所天。子毋辭。余笑曰。天下無此易事。且嚴親在兵火。我歸當棄妻子以徇。兩過子。皆路梗中。無聊閒步耳。子言突至。余甚訝。即果爾。亦塞耳堅謝。無徒悞子。復宛轉云。君儻不終棄。誓待君堂上畫錦旋。余答云。若爾。當與子約。驚喜申囑。語絮絮不悉。記。即席作八絕句付之歸。歷秋冬奔馳萬狀。至壬午仲春。都門政府。言路諸公。恤勞臣之勞。憐獨子之苦。馳量移之耗。先報余時。正在毘陵。聞音如石去心。因便道吳門。慰陳姬。蓋殘冬屢趣。余皆未及答。至則十日前。復爲寶霍門下客。以勢逼去。先吳門有嬖之者。集千人誹劫之。勢家復爲大言挾詐。又不惜數千金爲賄。地方恐貽伊戚。劫出復納入。余至恨惘無極。然以急嚴親患難。負一女子無憾也。是晚登轡。因與友覓舟去。虎嘯夜遊。明日遣人之襄陽。便解維歸里。舟過一橋。見小樓立水邊。偶詢友人。

此何處。何人之居。友以雙成館對。余三年積念。不禁狂喜。卽停舟相訪。友阻云。彼前亦爲勢家所驚。危病十有八日。母死。鑄戶不見客。余強之上。叩門至再三。始啓戶。燈火闌如。宛轉登樓。則藥餌滿几榻。姬呻吟詢何來。余告以昔年曲欄醉晤人。姬憶淚下曰。曩君屢過。余雖僅一見。余母恒背稱君奇秀。爲余惜。不共君盤桓。今三年矣。余母新死。見君憶母言猶在耳。今從何處來。便強起揭帷帳審視。余且移燈留坐榻上。譚有頃。余憐姬病。願辭去。牽留之曰。我十有八日。寢食俱廢。沈沈若夢。驚魂不安。今一見君。便覺神怡。氣王旋名其家。俱酒食飲榻前。姬輒進酒。屢別屢留。不便去。余告之曰。明早遣人去襄陽。告家君。量移喜耗。若宿卿處。詰旦不敢報平安。俟發使行。寧少停半刻也。姬曰。子誠殊異。不敢留。遂別。越旦楚使行。余急欲還。友人及僕從咸云。姬昨僅一倚蓋。拳切不可負。仍往言別。至則姬已妝成。凭樓凝睇。見余舟登岸。便疾趨登舟。余具述卽欲行。姬曰。我裝已戒。隨路祖送。余卻不得卻。阻不忍阻。由許關至梁溪。毘陵。陽羨。澄江。抵北固。閱二十七日。凡二十七辭。姬惟堅以身從。登金山。誓江流曰。妾此身如江水東下。斷不復返吳門。余變色拒絕。告以期逼。科試年來以大人滯危疆。家事委棄老母。定省俱違。今始歸經理一切。且姬吳門賁逋甚衆。金陵落藉亦費商量。仍歸吳門。俟季夏應試。相約同赴金陵。秋事畢。第與否始暇。及此。此時纏綿兩妨無益。姬仍躊躇不肯行。時五木在几。一友戲云。卿果終如願。當一擲得巧。姬肅拜於船窗。祝畢一擲得全。六時同舟稱異。余謂果屬天成。倉卒不臧。反債乃事。不如暫去。徐圖之。不得已始掩面痛哭失聲。

而別。余雖憐姬。然得輕身歸如釋重負。纔抵海陵。旋就試。至六月抵家。荆人對余云。姬令其父先已過江。來云。姬返吳門。茹素不出。惟翹首聽金陵偕行之約。聞言心異。以十金遣其父去。曰。我已憐其意而許之。但令靜俟。場事畢後。無不可耳。余感荆人相成相許之雅。遂不踐走使迎姬之約。竟赴金陵。俟場後報姬。桂月二五之晨。余方出闌。姬猝到。桃葉寓館。蓋望余耗不至。孤身挈一幅。買舟來自吳門。江行遇盜。舟匿蘆葦中。舵損不可行。炊煙遂斷。三日。初入抵三山門。又恐擾余。首場文思。復遲二日始入。姬見余。雖甚喜。細述別後百日茹素杜門。與江行風波盜賊驚魂狀。則聲色俱瘳。求歸逾固。時魏塘雲間閩豫諸同社。無不高姬之識。憫姬之誠。咸爲賦詩作畫以堅之。場事竣。余忘意必第。自謂此後當料理姬事。以報其志。詎十七日忽傳家君舟抵江干。蓋不赴寶慶之調。自楚休致矣。時已二載違養。冒兵火生還。喜出望外。遂不及爲姬商去留。竟從龍潭尾家君舟抵鑾江。家君閱余文。謂余必第。復留之鑾江候榜。姬從桃葉寓館。仍發舟追余。燕子磯阻風。復幾羅不測。重盤桓。鑾江舟中七日。乃榜發。余中副車。窮日夜力歸里門。而姬痛哭相隨不肯返。且細悉姬吳門諸事。非一手足力所能了。責逋者見其遠來。益多奢望。衆口狺狺。且嚴親甫歸。余復下第。意阻。萬難卽諧。舟抵郭外樸巢。遂冷面鐵心與姬決別。仍令姬歸吳門。以厭責逋之意。而後事可爲也。陽月過潤州。謁房師鄭公時。閩中劉大行自都門來。與陳大將軍及同盟劉刺史飲舟中。適奴子自姬處來云。姬歸不脫去嘗衣。此時尙方空在體。謂余不速往圖之。彼甘凍死。劉大行指余曰。辟疆

夙稱風義。固如是負一女子耶。余云黃衫押衙。非君。虞仙客所能自爲。刺史舉杯奮袂曰。若以千金委我。出入卽於今日往。陳大將軍立貸數百金。大行以棧數劬佐之。詎謂刺史至吳門。不善調停。衆譁決裂。逸去吳江。余復還里。不及訊。姬孤身維谷。難以收拾。虞山宗伯聞之。親至半塘。納姬舟中。上至薦紳。下及市井。纖悉大小。三日爲之區畫。立盡。索券盈尺。樓船張晏。與姬餞於虎嘯。旋買舟送至吾臯。至月之望。薄暮。侍家君飲於拙存堂。忽傳姬抵河干。接宗伯書。娓娓瀟灑。始悉其狀。且卽馳書貴門。生張祠部。立爲落藉。吳門後有細瑣。則周儀部終之。而南中則李總憲舊爲禮垣者與力焉。越十月。願始畢。然往返葛藤。則萬斛心血所灌注而成也。

杜茶村曰。是篇娓娓至數千言。浩浩蕩蕩。西起崑崙。東注溟渤。冲瀾窈窕。異派分支。千態萬狀。委媚橫生。頓使會真長恨等篇。黯然失色。非辟疆不能爲此文。非姬莫能當此作。真千秋大觀矣。情語云乎哉。壬午清和晦日。姬送余至北固山下。堅欲從渡江歸里。余辭之力。益哀切不肯行。舟泊江邊。昔西先生畢今梁。寄余夏西洋布一端。薄如蟬紗。潔比雪豔。以退紅爲裏。爲姬製輕衫。不減張麗華桂宮霓裳也。偕登金山。時四五龍舟。衝波激盤而上。山中遊人數千。尾余兩人。指爲神仙。遶山而行。凡我兩人所止。則龍舟爭赴。廻環數匝。不去。呼詢之。則駕舟者。皆余去秋蒞回官舫長年也。勞以醵酒。竟日返舟。舟中宣磁大白。孟盛櫻珠數升。其啖之。不辨共爲櫻爲唇也。江山人物之盛。炤映一時。至今譚者侈矣。

秦淮中秋日。四方同社諸友。咸姬爲余不辭盜賊風波之險。間關相從。因置酒桃葉水閣。時在座爲眉樓顧夫人寒秀齋李夫人。皆與姬爲至戚。美其屬余。咸來相慶。是日新演燕子箋。曲盡情豔。至霍華離合處。姬泣下。顧李亦泣下。一時才子佳人。樓臺煙水。新聲明月。俱足千古。至今思之。不異游仙枕上夢幻也。鑾江汪汝爲園亭極盛。而江上小園尤收拾江山勝槩。壬午鞠月之朔。汝爲會延余及姬於江口梅花亭子上。長江白浪。擁象奔赴杯底。姬轟飲巨巨羅。觴政明肅。一時在坐諸妓皆頽唐清逸。姬最溫謹。是日豪情逸致。則余僅見。

乙酉余奉母及家眷流寓鹽官。春過半塘。則姬之舊寓固宛然在也。姬有妹曉生。同沙九畹登舟過訪。見姬爲余如意珠。而荆人賢淑。相視如復水乳。羣美之羣妬之。同上虎邱。與余指點舊遊。重理前事。吳門知姬者咸稱其俊識。得所歸云。

鴛鴦湖上煙雨樓高透迤。而東則竹亭園半在湖內。然環城四面名園勝寺。夾淺渚層溪而漱澗者。皆湖也。游人一登煙雨樓。遂謂已盡其勝。不知浩瀚幽渺之致。正不在此。與姬曾爲竟日游。又共追憶錢塘江下桐君巖瀨。碧浪蒼巖之勝。姬更云新安山水之逸。在人枕竈間。尤足樂也。

杜茶村曰。金山一點。屹當四練之中。胭脂六朝。香染金陵之地。樓名煙雨。湖字鴛鴦。而二妙采真。披雲擷秀。讀之令人步步欲仙。寧但兩越天都。嵐翠沾酒衣裾已也。

虞山宗伯送姬抵吾里。時余侍家君飲於家園。倉卒不敢告嚴君。又侍飲至四鼓不得散。荆人不待余歸。先爲潔治別室。幃帳燈火器具飲食。無一不頃刻具。酒闌見姬。姬云。始至。止不知何故。不見君。但見婢婦簇我登岸。心竊懷疑。且深恟駭。抵斯室。見無所不備。傍詢之。始感歎主母之賢。而益快經歲之矢相從不誤也。自此姬居別室。卻管絃。洗鉛華。精學女紅。恒月餘不啓戶。耽寂享恬。謂驟出萬頃火雲。得憩清涼界。回視五載風塵。如夢如獄。居數月。於女紅無所不妍巧。錦繡工。鮮刺巾裙如蟣無痕。日可六幅。剪綵織字。縷金迴文。各厭其技。針神針。絕前無古人已。

姬在別室四月。荆人攜之歸。入門。吾母太恭人與荆人見而愛異之。加以殊眷。幼姑長姊。尤珍重相視。謂其德性舉止。迥非常人。而姬之侍左右。服勞承旨。較婢婦有加無已。烹茗剝果。必手進。開眉解意。爬背噏痒。當大寒暑。折膠鑠金時。必拱立庠隅。強之坐。飲食旋坐。旋飲食。旋起執役。拱立如初。余每課兩兒。文不稱意。加夏楚。姬必督之。改削成章。莊書以進。至夜不懈。閱九年。與荆人無一言柄鑿。至於視衆御下。慈讓不遑。咸感其惠。余出入應酬之費。與荆人日用金錯泉布。皆出姬手。姬不私銖兩。不愛積蓄。不製一寶粟。餽錙死能彌留。元旦。次日必欲求見老母。始瞑目。而一身之外。金珠紅紫。盡卻之。不以殉。洵稱異人。

杜茶村曰。斷斷是再來人。一毫不苟。一絲不掛。誠然而來。誠然而往。吾以比之董永織女。薛嵩紅線。余數年來。欲哀集四唐詩。購全集。賴逸事。集衆評。列人與年爲次第。每集細加評選。廣搜遺失。成一代大

觀初盛稍有次第。中晚有名無集。有集不全。并名集俱未見者甚夥。品彙六百家大略耳。卽紀事本末。千餘家名姓事蹟稍存。而詩不具。全唐詩話更覺寥寥。蘭隅先生序十二唐人。稱豫章大家藏中晚未刻集七百餘種。孟津王師向余言。買靈寶許氏全唐詩數車滿載。卽襄流寓鹽官。胡孝懷職方批閱唐人詩。剗刪工費需數千金。僻地無書可借。近復裹足牖下。不能出遊購之。以此經營搜索。殊費心力。然每紀一帙。必細加丹黃。他書中有涉此集者。皆錄首簡。付姬收貯。至編年論人。準之唐書。姬終日佐余稽查抄寫。細心商訂。永日終夜。相對忘言。閱詩無所不解。而又出慧解以解之。尤好熟讀楚詞。少陵。義山。王建。花蕊夫人。王珪。三家宮詞等身之書。周廻座右。午夜衾枕間。猶擁數十家唐詩而臥。今秘閣塵封。余不忍啓。將來此志。誰克與終。付之一歎而已。

猶憶前歲。余讀東漢至陳仲舉范滂諸傳。爲之撫几。姬一一求解其始末。發不平之色。而妙出持平之議。堪作一則史論。

乙酉客鹽官。嘗向諸友借書讀之。凡有奇僻。命姬手抄。姬於事涉閨閣者。則另錄一帙。歸來與姬遍搜諸書。續成之名曰奩豔。其書之瑰異精秘。凡古今女子。自頂至踵。以及服食器具。亭臺歌舞。針神才藻。下及禽魚鳥獸。卽草木之無情者。稍涉有情。皆歸香艷。今細字紅箋。鉅分條悉。俱在奩中。客春顧夫人遠向姬借閱此書。與張奉常極讀其妙。促繡梓之余。卽當忍痛爲之校讎鳩工。以終姬志。

姬初入吾家。見董文敏爲余書月賦。倣鍾繇筆意者。酷愛臨摹。嗣遍覓鍾太傅諸帖學之。閱戎輅表。稱關帝君爲賊將。遂廢鍾學。曹娥碑。日寫數千字。不訛不落。余凡有選摘。立抄成帙。或史或詩。或遺事妙句。皆以姬爲紺珠。又嘗代余書小楷扇。存戚友處。而荆人米鹽瑣細。以及內外出入。無不各登手記。毫髮無遺。其細心專力。卽我輩好學鮮及也。

杜茶村曰。閨秀較書鑒賞。唐有薛濤。宋有李易安。濤風塵老醜。易安失身匪人。終爲風雅之玷。宛君才藻精敏。益見芳貞而真。嗜好本之天性。方之大家女史何愧。

姬于吳門。曾學畫未成。能作小叢寒樹。筆墨楚楚。時於几硯上。輒自圖寫。故於古今繪事。別有殊好。偶得長卷小軸。與笥中舊珍。時時展玩不置。流離時寧委奩具。而以書畫捆載自隨。末後盡裁裝潢。獨存紙絹。猶不得免焉。則書畫之厄。而姬之嗜好真且至矣。

姬能飲。自入吾門。見余量不勝蕉葉。遂罷飲。每晚侍荆人數杯而已。而嗜茶與余同性。又同嗜片芥。每歲半塘願子兼。擇最精者。緘寄。具有片甲。蟬翼之異。文火細煙。小鼎長泉。必手自吹瀝。余每誦左思嬌女詩。吹噓對鼎鑪之句。姬爲解頤。至沸乳看蟹目。魚鱗傳盞。選月魂雲魄。尤爲精絕。每花前月下。靜試對簪。碧沈香泛。真如木蘭沾露。瑤草臨波。備極廬陸之致。東坡云。分無玉腕捧蛾眉。余一生清福。九年占盡。九年折盡矣。

姬每與余靜坐香閣。細品名香。宮香諸品。淫。沉水香俗。俗人以沉香著火上。煙樸油膩。頃刻而滅。無論香之性情未出。卽著懷袖。皆帶焦腥。沉香有堅緻而紋橫者。謂之橫隔沉。卽四種沉香內草沉橫紋者是也。其香特妙。又有沉水結而未成。如小笠大蘭。名蓬萊者。余多蓄之。每慢火隔砂。使不見煙。則閣中皆如風過伽楠。露沃薔薇。熱磨琥珀。酒傾犀噀之味。久蒸衾枕間。和以肌香。甜豔非常。夢魂俱適。外此則有真西洋香。方得之內府。迥非肆料。丙戌客海陵。曾與姬手製百丸。誠閨中異品。然熏時亦以不見煙爲佳。非姬細心秀致。不能領略到此。

黃熟出諸番。而真臘爲上。皮堅者爲黃熟桶氣。佳而通黑者。爲夾機黃熟。近南粵東莞茶園村。土人種黃熟。如江南之藝茶。樹矮枝繁。其香在根。自吳門解人剔根切白。而香之鬆朽盡削油尖。鐵面盡出。余與姬客半塘時。知金平叔最精於此。重價數購之。塊者淨潤長曲者如枝如虬。皆就其根之有結處。隨紋縷出。黃雲紫繡。半雜鷓鴣斑。可拭可玩。寒夜小室。玉幃四垂。覆氈重疊。燒二尺許絳蠟二三枝。設參差臺几。錯列大小數宣爐。宿火常熱。色如液金粟玉。細撥活灰。一寸灰上隔砂。選香蒸之。歷半夜一香凝然。不焦不竭。鬱勃氤氳。純是糖結熱香。間有梅萼半舒。荷鵝梨蜜脾之氣。靜參鼻觀。憶年來共戀此味。此境恒打曉鐘。尙未着枕。與姬細想閨怨。有斜倚薰籠。撥盡寒爐之苦。我兩人如在藥珠衆香深處。令人與香氣俱散矣。安得返魂一粒。起於幽房局室中也。

一種生黃香。亦從枯瘠朽癰中。取其脂凝。脈結嫩而未成者。余嘗過三吳。白下。遍收篋箱中。蓋面大塊。與粵客自攜者。甚有大根株。塵封如土。皆留意覓得。攜歸與姬爲晨夕清課。督婢子手自剝落。或舐許僅得數錢。盈掌者僅削一片。嵌空鏤剔。纖悉不遺。無論焚蒸。卽嗅之味如芳蘭。盛之小盤。層會中。色殊香別。可弄可餐。曩幢以一二示粵友黎美周。訝爲何物。何從得如此精妙。卽蔚宗傳中恐未見耳。

又東莞以女兒香爲絕品。蓋土人揀香。皆用少女。女子先藏最佳大塊。暗易油粉。好事者復從油粉擔中易出。余曾得數塊於汪友處。姬最珍之。

余家及園亭。凡有隙地。皆植梅。春來早夜出入。皆爛熳香雪中。姬於含蕊時。先相枝之橫斜。與几上軍持相受。或隔歲便芟。翦得宜。至花放恰探入供。卽四時草花竹葉。無不經營絕慧。領略殊清。使冷韻幽香。恒霏微於曲房斗室。至穠豔肥紅。則非其所賞也。

秋來猶耽晚菊。卽去秋病中。客貽我翦桃紅。花繁而厚。葉碧如染。濃條婀娜。枝枝具雲罨風斜之態。姬扶病三月。猶半梳洗。見之甚愛。遂留榻右。每晚高燒翠蠟。以白團圓六曲圍。三面設小座於花間。位置菊影。極其參橫妙麗。始以身入。人在菊中。菊與人俱在影中。迴視屏上。顧余曰。菊之意態盡矣。其如人瘦何。至今思之。澹秀如畫。

閨中蓄春蘭九節及建蘭。自春徂秋。皆有三湘七澤之韻。沐浴姬手。尤增芳香。藝蘭十二月歌。皆以碧箋

手錄粘壁。去冬姬病。枯萎過半。樓下黃梅一株。每臘萬花可供。三月插戴。去冬姬移居香儂園靜攝。數百枝不生一藥。惟聽五鬢濤聲。增其淒響而已。

姬最愛月。每以身隨升沉爲去住。夏納涼小苑。與幼兒誦唐人咏月。及流螢執扇詩。半榻小几。恒屢移領。月之四面。午夜歸閣。仍推窗延月於枕簟間。月去復捲幔倚窗而望。語余曰。吾書謝莊月賦。古人厭晨歡。樂宵宴。蓋夜之時逸。月之氣靜。碧海青天。霜縞冰淨。較赤日紅塵。迥隔仙凡。人生攘攘。至夜不休。或有月未出。已鼾睡者。桂華露影。無福消受。與子長歷四序。娟秀浣潔。領略幽香。仙路禪關。於此靜得矣。

李長吉詩云。月灑灑。波煙玉。姬每誦此三字。則反覆廻環。日月之精神氣韻。光景盡於斯矣。人以身入波。煙玉世界之下。眼如橫波。氣如湘煙。體如白玉。人如月矣。月復似人。是一是二。覺賈長江倚影爲三之語。尙贅。至淫耽無厭化蟾之句。則得翫月三昧矣。

杜茶村曰。絕域名香。重霄皓魄。奇花異茗。倚態爭芬。自非真仙瓊媛。莫可得而領略。兼之天才麗質。把玩晨昏。玉臂雲鬢。馥郁於琉璃世界中矣。

姬性澹泊。於肥甘一無嗜好。每飯以芥茶一小壺溫淘。佐以水菜香豉數莖粒。便足一餐。余飲食最少。而嗜香甜及海錯風薰之味。又不甚自食。每喜與賓客共賞之。姬知余意。竭其美潔。出佐盤盂。種種不可悉記。隨手數則。可觀一斑已。

釀飴爲露。和以鹽梅。凡有色香花蕊。皆於初放時採漬之。經年香味顏色不變。紅鮮如摘。而花汁融液。露中入口。噴鼻奇香異。非復恒有。最嬌者爲秋海棠露。海棠無香。此獨露凝香發。又俗名斷腸草。以爲不食而味美。獨冠諸花。次則梅英。野薔薇。玫瑰。丹桂。甘菊之屬。至橙黃。橘紅。佛手。香櫞。去白縷絲。色味更勝。酒後出數十種。五色浮動白瓷中。解醒消渴。金莖仙掌。難與爭衡也。

取五月桃汁。西瓜汁。一棖一絲。瀝盡。以文火煎至七八分。始攪糖細煉。桃膏如大紅琥珀。瓜膏可比金絲。內糖每酷暑。姬必手取其汁。示潔。坐爐邊靜看火候。成膏不使焦枯。分濃澹爲數種。此尤異色異味也。雙鼓取色。取氣先於取味。豆黃九晒。九洗爲度。顆瓣皆剝去衣。種細料。瓜杏薑桂。以及釀鼓之汁。極精潔以和之。鼓熟。擊出粒粒可數。而香氣甜色。殊味迥與常別。

紅乳腐。烘蒸各五六次。內肉既酥。然後削其膚。益之以味。數日而成者。絕勝建寧三年之蓄。他如冬春水。陶諸菜。能使黃者如蠟。碧者如落蒲藕。鮮花野菜。枸蒿。蒼菊之類。無不採入食品。芳旨盈席。

火肉久者無油。有松栢之味。風魚久者如火肉。有麋鹿之味。醉蛤如桃花。醉鱖骨如白玉。油蜆如鱖魚。蝦鬆如龍鬚。烘兔酥雉如餅餌。可以籠而食之。菌脯如雞饅。腐湯如牛乳。姬細考之食譜。四方郇厨中一種偶異。卽加訪求。而又以慧巧變化爲之。莫不異妙。

杜茶村曰。一七一櫞。異香絕味。使人作五鯖八珍之想。

甲申三月十九之變。余邑清和望後。始聞的耗。邑之司命者甚懦。豺虎狎踞城內。聲言焚劫郡中。又有興平兵四潰之警。同里紳衿大戶。一時鳥獸駭散。咸去江南。余家集賢里世。恂讓家君以不出門自固。閱數日。上下三十餘家。僅我竈有炊煙耳。老母荊人懼。暫避郭外。留婢侍余。姬局內室。惟經紀衣物。書畫文券。各分精蠶。散付諸僕婢。皆手書封識。羣橫日劫。殺人如草。而隣石人影落落如晨星。勢難獨立。只得覓小舟奉兩親。挈家累。欲衝險從南江渡澄江北。一黑夜六十里。抵泛湖洲朱宅。江上已盜賊蜂起。先從間道微服送家君從靖江行。夜半家君向余曰。途行需碎金無從辦。余向姬索之。姬出一布囊。自分許至錢許。每十兩可數百小塊。皆小書輕重於其上。以便倉卒隨手取用。家君見之訝且歎。謂姬何暇精細及此。維時諸費較平日溢十倍。尙不肯行。又遲一日。以百金雇十舟。以百餘金募一百人護舟。甫行數里。潮落舟膠不得上。遙望江口大盜數百人。踞六舟爲犄角守隘以俟。幸潮落不能下逼我舟。朱宅遣有力人負浪踏水馳報曰。後岸盜截歸路不可返。護舟二百人中且多盜黨。時十舟哄動。僕從呼號垂涕。余笑指江上衆人曰。余三世百口咸在舟。自先祖及余祖孫父子六十七年來。居官居里。從無負心負人之事。若今日盡死盜手葬魚腹。是上無蒼蒼。下無茫茫矣。潮忽蚤落。彼此舟停不相值。便是天相。爾輩無恐。卽舟中敵國不能爲我害也。先夜收拾行李登舟時。思大江連海。老母幼子從未履此奇險。萬一阻石尤欲隨路登岸。何從覓輿輶。三鼓時以二十金付沈姓人。求雇二輿三車夫六人。沈與衆咸詫異笑之。謂明早一帆

未午便登彼岸。何故黑夜多此難尋無益之費。倩榜人募輿夫。觀者絕倒。余必欲此二者。登舟始行。至斯時雖神氣自若。然進退維谷。無從飛脫。因詢出江未遠。果有別口登岸。通泛湖洲者。舟子曰。橫去半里有小路六七里。竟通彼。余急命鼓櫂至岸。所募輿車三事。恰受俯仰七人。餘行李婢婦盡棄舟中。頃刻抵朱宅。衆始歎余之夜半必欲水陸兼備之爲奇中也。大盜知余中遁。又朱宅聯絡數百人。爲余護發行。李人口盜雖散去。而未厭之志。恃江上法網不到。且值無法之時。明集數百人。遣人諭余以千金相致。否則竟圍朱宅。四面舉火。余復笑答曰。盜愚甚。爾不能截我於中流。乃欲從平陸數百家中火攻之。安可得哉。然泛湖洲人名雖相衛。亦多不軌。余傾囊召閩莊人付之。令其夜設牲酒。齊心於莊外備不虞。數百人飲酒分金。咸去他所。余卽於是夜一手扶老母。一手曳荆人。兩兒又小。季甫生旬日。同其母付一信僕偕行。從莊後竹園深簷中蹣跚出。維時更無能手援。余廻顧。姬曰。汝速蹴步。則尾余。後遲不及矣。姬一人顚連趨蹶。仆行里許。始仍得昨所雇輿。星馳至五鼓達城下。盜與朱宅之不軌者。未知余全家已去其地也。然身脫而行囊大半散矣。姬之珍愛盡失焉。姬返舍謂余。當大難時。首急老母。次急荆人。兒子幼弟爲是。彼卽顚連不及。死深簷中無憾也。午節返吾廬。金革與城內梟獍爲伍者十旬。至中秋始渡江入南都。別姬五閱月。殘臘余棄小草。回挈家隨家君之督漕任去江南。嗣寄居鹽官。因歎姬明大義。達權變如此。讀破萬卷者有是哉。

乙酉流寓鹽官五月。復值崩陷。余骨肉不過八口。去夏江上之累。綠僕婦難奔赴。動至百口。又以笨重行李四塞舟車。故不能輕身去。且來窺。此番決計置生死於度外。局戶不他之。乃鹽官城中。自相賊殺甚閼。兩親又不能安。復移郭外大白居。余獨令姬率婢婦守寓。不發一人一物出城。以貽身累。卽侍兩親挈妻子流離。亦以子身往。乃事不如意。家人行李紛沓。違命而出。

大兵迫攜李。薙髮之令初下。人心益皇皇。家君復先去。惹山內外莫知所措。余因與姬決。此番潰散。不似家園。尚有左右之者。而孤身累重。與其臨難捨子。不若先爲之地。我有年友信義多才。以子托之。此後如復相見。當結平生歡。否則聽子自裁。毋以我爲念。姬曰。君言善。舉室皆倚君爲命。復命不自君出。君堂上膝下有百倍增於我者。乃以我牽君之臆。非徒無益而又害之。我隨君友去。苟可自全。誓問隔匍匐以待。君回。脫有不測。前與君縱觀大海。狂瀾萬頃。是吾葬身處也。方命之行。而兩親以余獨割姬爲憾。復攜之去。自此百日。皆展轉深林僻路。茅屋漁艇。或月一徙。或日一徙。或一日數徙。飢寒風雨。苦不具述。卒於馬鞍山遇大兵。殺掠奇慘。天幸得一小舟。八口飛渡。骨肉得全。而姬之驚悸瘁瘁。至矣盡矣。

秦嶺蒙難之後。僅以俯仰八口免。維時僕婦殺掠者幾二十口。生平所蓄玩物。及衣貝靡子遺矣。亂稍定。匍匐入城。告急於諸友。卽襖被不辦。夜假蔭於方坦庵年伯。方亦竄跡初回。僅得一氈。與三兄共裹臥耳。房時常殘秋。窗風四射。翌日各乞斗米束薪於諸家。始暫迎二親。及家累返舊寓。余則感寒痼瘡沓伴矣。

橫白板扉爲榻。去地尺許。積數破絮爲衾。爐煨桑節。藥缺攻補。且亂阻吳門。又傳聞家難劇起。自重九後。潰亂沈迷。迄冬至前。僵死一夜復甦。始得間關破舟。從骨林肉莽中。冒險渡江。猶不敢竟歸家園。暫棲海陵。閱冬春百五十日。病方稍痊。此百五十日。姬僅捲一破席。橫陳榻傍。寒則擁抱。熱則披拂。痛則撫摩。或枕其身。或衛其足。或欠伸起伏。爲之左右翼。凡病足之所適。皆以身就之。鹿鹿永夜。無形無聲。皆存視聽。湯藥手口交進。下至糞穢。皆接以目。鼻細察色味。以爲憂喜。日食麤糲一餐。與顧天稽首外。惟跪立我前。溫慰曲說。以求我之破顏。余病失常性。時發暴怒。詎諱三至。色不少忤。越五月如一日。每見姬星靨如蠟。弱骨如柴。吾母太恭人及荆妻。憐之感之。願代假一息。姬曰。竭我心力。以殉夫子。夫子生而余死。猶生也。脫夫子不測。余留此身於兵燹間。將安寄托。更憶病劇時。長夜不寐。莽風飄瓦。鹽官城中。日殺數十百人。夜半鬼聲啾唧。來我破窗前。如蛩如箭。舉室飢寒之人。皆辛苦踰睡。余背貼姬心而坐。姬以手固握余手。傾耳靜聽。淒激荒慘。歎歎流淚。姬謂余曰。我人君門整四歲。蚤夜見君所爲。慷慨多風義。豪髮幾微。不憚薄惡。凡君受過之處。惟余知之。亮之。敬君之心。實踰於愛君之身。鬼神讀歎。畏避之身也。冥漠有知。定加默祐。但人生身當此境。奇慘異險。動靜備歷。苟非金石。鮮不銷亡。異日幸生。還當與君敵。萬有逍遙物外。慎毋忘此際此語。噫。吁。嘻。余何以報姬於生死哉。姬斷斷非人世凡女子也。

杜茶村曰。才子佳人。多生亂世。如王嬙。文姬。綠珠。莫可縷數。姬生斯時宜矣。奔馳患難。終保玉顏無恙。

首邱繡闥。復得夫君五色彩毫。以垂不朽。孰謂其不幸歟。

丁亥。讖口鑠金。太行千盤。橫起人面。余胸墳五嶽。長夏鬱蟠。惟蚤夜焚二紙。告關帝君。久抱奇疾。血下數斗。腸胃中積如石之塊。以千計。驟寒驟熱。片時數千語。皆首尾無端。或數晝夜不知醒。醫者妄投以補。病益篤。勺水不入口者二十餘日。此番莫不謂其必死。余心則炯炯然。蓋余之病不從境入也。姬當大火鑠金時。不揮汗。不驅蚊。晝夜坐藥爐傍。密伺余於枕邊足畔。六十晝夜。凡我意之所及。與意之所未及。咸先後之。已丑秋疽發於背。復如是百日。余五年危疾者三。而所逢者皆死疾。惟余以不死待之。微姬力。恐未必能堅以不死也。今姬先我死。而永訣時。惟慮以伊死增余病。又慮余病。無伊以相待也。姬之生死。爲余纏綿如此。痛哉痛哉。

杜茶村曰。此種精誠。格天徹地。嘔血剖心。能與龍比並忠。曾閔並孝。萬祀千秋。傳之不朽。

余每歲元旦。必以一歲事。卜一籤於關帝君前。壬午名心甚劇。禱着籤首第一字得憶字。蓋憶昔蘭房分半釵。如今忽把信音乖。癡心指望成連理。到底誰知事不諧。余時占玩不解。卽占全詞。亦非功名語。比遇姬清和晦日。金山別去。姬茹素歸虔。卜於虎嘯關帝君前。願以終身事余。正得此籤。秋過秦淮。述以相告。恐有不諧之歎。余聞而訝之。謂與元旦籤合。時友人在坐曰。我當爲爾二人。合卜於西華門。則仍此籤也。姬愈疑懼。且慮余見此籤中解。憂形於面。乃後卒滿其願。蘭房半釵。癡心連理。皆天然閨閣中語。到底不

諾。則今日驗矣。嗟乎。余有生之年。皆長相憶之年也。憶字之奇。且驗若此。

姬之衣飾。盡失於患難。歸來澹足不置一物。戊子七夕。看天上流霞。忽欲以黃跳脫摹之。命余書乞巧二字。無以屬對。姬云。曩於黃山巨室。見覆祥雲。真宣爐款式佳絕。請以覆祥對乞巧。鐫摹頗妙。越一歲。釧忽中斷。復爲之恰七月也。余易書比翼連理。姬臨終時。自頂至踵。不用一金珠紈綺。獨留跳脫不去手。以余勤書故。長生私語。乃太真死後。憑洪都客述。寄明皇者。當日何以率書。竟令長恨再譜也。

姬書法秀媚。學鍾太傅稍瘦。後又學曹娥。余每有丹黃。必對泓穎。或靜夜焚香。細細手錄。閨中詩史。咸秩皆遺跡也。小有吟咏。多不自存。客歲新春二月。卽爲余抄選全唐五七言絕句上下二卷。是日偶讀七歲女子所嗟人異鴈。不作一行歸之句。爲之凄然下淚。至夜和成八絕。哀聲怨響。不堪卒讀。余挑鐙一見。大爲不憚。卽奪之焚去。遂失其稿。傷哉。今歲恰以是日長逝也。

客春三月。欲重去鹽官。訪患難相恤諸友。至邗上。爲同社所淹。時余正四十。諸名流咸爲賦詩。饗奉常獨譜姬始末。成數千言。帝京篇。連昌宮。不足比擬。奉常云。子不自註。則余苦心不見。如桃花瘦盡春醒面。七字縮合。已卯臘。壬午病。晤兩番光景。誰則知者。余時應之。未卽下筆。他如園次之自昔文人稱孝子。果然名士悅傾城。于皇之大婦同行小婦尾。孝威之人在樹間殊有意。婦來花下卻能文。心甫之珊瑚架筆香印屨。著富名山金屋尊。仙期之錦瑟蛾眉隨分老。芙蓉園上萬花紅。仲謀之君今四十能高舉。羨爾鴻

妻佐春杵。吾邑徂徠先生。韜藏經濟一巢樸。游戲鶯花兩閣和。元旦之蛾眉問難佐書幃。皆爲余慶得。姬詎謂我侑卮之辭。乃姬誓墓之狀耶。讀余此難述。當知諸公之詩之妙。而去春不註奉常詩。蓋遲至今日。當以血淚和糜險也。

三月之杪。余復移寓友沂友雲軒。久客臥雨。懷家正劇。晚霽。襲奉常偕于皇園次。過慰留飲。聽少奚管絃度曲。時余歸思更切。因限韻各作詩四首。不知何故。詩中咸有商音。三鼓別去。余甫着枕。便夢還家。舉室皆見。獨不見姬。急詢荆人不答。復徧覓之。但見荆人背余下淚。余夢中大呼曰。豈死耶。一慟而醒。姬每春必抱病。余深疑慮。旋歸則姬固無恙。因問述此相告。姬曰。甚異。前亦於是夜夢數人強余去。匿之幸脫。其人猶猶不休也。詎知夢真。而詩讖咸來相告哉。

杜茶村曰。名士名姬。精爽俱至。動與神孚。故其卜兆揮毫。宛然對語。願造物胡不少延其算耶。惜哉。

巢民先生生多奇遇。而中年後屢悲死別。殆禪家所謂修慧修福。而未了愁緣者。願色能伐性。憂能傷人。而先生獨享大年。其以色壽者歟。抑以憂延齡者歟。癸巳秋日。松陵楊復吉識。

